

四庫全書

集部

欽定四庫全書

集部

宋詩紀事卷四十八

詳校官給事中臣鄧文洋

侍讀臣孫球覆勘

總校官進士臣繆琪

校對官中書臣牛稔文

謄錄監生臣袁繼升

欽定四庫全書

宋詩紀事卷四十七

錢塘厲鶚撰

楊由義

由義字宜之開封人避地鹽官與漕薦不第以  
父奉直恩補右階監贍南軍庫隆興初以閤門  
祇候使金不屈而還孝宗嘉歎累遷太府卿兼  
刑部侍郎徽國朱文公曾受業焉

弔王忠肅

名稟靖康時堅守太原城陷父子同赴  
水死

太原城下屹行宮雲樹龍蔥掩碧空鐵馬無聲汾水急  
滿天風雨泣英雄

海寧縣志

李浩

浩字德遠臨川人紹興十二年進士孝宗朝歷  
官直寶謨閣知靖江府召還擢權吏部侍郎旋  
予祠除祕閣修撰帥夔部卒贈集英殿修撰

東西船行

東船得風帆席高千里瞬息輕鴻毛西船見笑苦遲鈍

汗流撐折百張篙明日風翻波浪異西笑東船卻如此  
東西相笑無已時我但行藏任天理

合璧事類外集

述陂

在臨川縣

數椽臨蒼波我目得以寓長溪山根來澄潭一回互萬  
象森可掬脩脩澹清素草短牛羊飢沙暖鳬鶩聚枯槎  
自斷岼孤艇橫野渡荒寒何代城隱翳尚門戶昔時歌  
舞地今日採樵路回薄萬古心斜陽在烟樹

出疎山

忙中安得此身閒杖策西風自往還今日已償雲水債  
籃輿帶雨下疎山

以上撫州府志

陳知柔

知柔字體仁號休齋永春人紹興十二年進士

知循州徙賀州

萬年寺

古寺來投宿雲巖第幾層有詩堪供佛無事且依僧小  
閣泉喧枕修廊雨暗燈好峯看未足幽夢幾回登

天台志

九日宴蓮花峰

多病登臺今古情菊花搖動午涼生  
山前木落石巖出海上潮來秋渚平  
野興已隨芳草遠歸鞭更傍落霞明  
媿無十丈開花句獨卧禪房心自清

南安縣志

魏杞

杞字南夫壽春人徙居鄞紹興十二年進士孝  
宗朝累遷宗正少卿拜參知政事尚書右僕射  
兼樞密使出知平江府卒贈特進諡文節有山

房集

送左彥武歸鄉

折桂歸來日西風萬里秋  
錦衣天上客紅葉渡頭舟  
把酒難為別題詩更欲留  
明朝山水隔何日是重遊

寧國府志

李庚

庚字子長臨海人紹興十二年進士歷官監察御史知袁州有集號吟癡符

樓大防序云海邦貨魚于市者夸詡其美謂之吟魚字書以為吟街賣也顏黃門之推家訓曰



吾見世人至無才思自謂清華流布醜拙亦已  
衆矣江南號為吟癡符公之意蓋出于此特錄  
詞耳

### 畫扇

睡起小樓春又殘半垂雲袖傍闌干楊花飛過秋千索  
一陣東風作曉寒

前賢小集拾遺

### 劉珙

珙字共父忠顯公幹孫忠定公子羽之子紹興  
十二年進士孝宗朝累官同知樞密院事知建

康府江東安撫使行宮留守進觀文殿學士卒  
贈光祿大夫諡忠肅

帥潭日勸駕詩

十載湘江守重來白髮垂初無下車教再賦食苹詩天  
闊搏鵬翼春融長桂枝功名儻來事大節要堅持

詩人  
王屑

送元晦

翩翩雙黃鶴結巢相因依一為天風便矯翮西北飛歲  
華及晚晚霜露侵征衣此行亦良苦千里以為期堂上

玄髮親榮祿當及茲人生會有役不復情淒涼徘徊都  
門道欲語行且遲念子抱孤桐窈窕弦古詞清商奮逸  
響激烈有餘悲不辭彈者勞正恐知音稀知音何足貴  
我顧不可追

翰墨大全

### 留正

正字仲至泉州永春人居惠州紹興十二年進  
士孝宗朝拜右丞相光宗即位進左丞相寧宗  
朝終少保觀文殿大學士封魏國公卒贈太師

諡忠宣

中興編年慶元偽學之禁凡五十九人宰執四人趙汝愚留正王藺周必大待制以上十三人朱熹徐誼彭龜年陳傅良薛叔似章穎鄭湜樓鑰林大中黃由黃黼何異孫逢吉餘官三十一人劉光祖呂祖儉葉適楊方項安世李惠沈有開曾三聘游仲鴻吳獵李祥楊簡趙汝談汝端陳峴范仲黼汪達孫元卿袁燮陳武田澹黃度張體仁蔡幼學黃灝周南吳柔勝王厚之孟浩趙輦白炎震武臣三人皇甫斌范仲任張志遠士人八人楊宏中周端朝張道林仲麟蔣傳徐範蔡元定呂祖泰朝野類要初入仕必具鄉貫三代名銜謂之腳色崇觀閒當書云不係元祐黨籍紹興閒即云不係童蔡朱王等親屬慶元閒加不是偽學方

與銓除

羅浮天漢橋

霏霏細雨濕芝田  
短短桃花照水妍  
可惜洞門關不盡  
彩虹天外著飛泉

惠州府志

史浩

浩字直翁鄞縣人  
紹興十五年進士  
孝宗朝累擢中書舍人翰林院學士知制誥歷右丞相封魏國公進太師卒追封會稽郡王諡文惠嘉定

中改諡忠定封越王配享孝宗廟庭有鄮峰真  
隱漫錄

淳熙丁酉九月丙辰宣召錫宴澄碧殿抵暮送以  
金蓮燭宿玉堂直廬應制古詩三十韻

季秋中澣日淳熙隆四禩朝回攬轡閒中使俄傳旨少  
頃日轉申宣詔陪燕喜預令埽玉堂深夜備棲止悚懼  
跼承命鳴騶亟穿市絳闕聳皇居非烟常靡靡入自東  
華門熊羆森爪士詔許乘肩輿安徐無跛倚復古距選

德相望幾數里脩廊接雲漢宮堯璨珠藥中途敞金扉  
恍若蓬壺裏羣山擁蒼壁四顧環弱水山既日夕佳水  
亦湛無滓冰簾映綺疏瓊殿中央峙澄碧耀宸奎龍神  
爭守視蹈舞上丹墀天威不遠咫尺奉觴祈萬壽時蒙一  
啟齒餘波丐鼠腹酒行不知幾徘徊下瑤席緩步煩玉  
趾從遊至清激錫坐談名理泉聲韻琴瑟一洗箏笛耳  
皇云萬機暇觀書每來此論道及帝王直欲齊其軌堯  
舜禹湯文前身無乃是臣言匪獻諛道實由心起既然

明是心要在力行爾登橋酬餘壘餘興未容已金蓮引  
雙燭再拜離階祀玉音寵諭臣此會宜有紀歸途感恩  
榮占罵忘骭骹

青櫺子

羽幘新從帝所回餘歡未盡玳筵開醉拋青子香泥上  
留與仙家取次栽

恭和御製翠寒堂詩

禁籞蔥蔥擁瑞雲雄樓傑閣環金碧花光草色媚芳辰



鳳輦春容惟所適中有虛堂玉作楹冰雪玲瓏周四壁  
不知跬步是瑤臺何須八駿殷勤覓青松萬古拱簷牙  
生香不減芝蘭室更欲相看飽歲寒疎梅瘦竹為三益  
吾皇土木未嘗興為詢此景從何得神運元從德壽來  
天成豈假人工役

進明堂慶成詩

六閔淳熙禋秋高日仲辛大君敷渙號重屋薦明禋玉  
輅興清廟龍旂旦紫宸雲陰連夜解霽色一朝新周禮

樽壘備虞韶樂舞陳合宮天地並侑席祖宗均峻城登  
三獻脩楹秩百神肅祇申睿意肸鬻降高旻宣室宜膺  
福慈闈亟拱宸筵花馳萬騎歸昨見雙親釐事超隆古  
年齡肇億春蓼蕭覃有截成命播無垠惠餽盼羣后恩  
波逮老臣祝堯非健筆徒學華封人

江倅出家樂

沈沈春酌話綢繆花月行船看拍浮手束柔荑調雁柱  
袖翻紋錦出香毬未攀青子猶如豆欲膾頰鱗始上鉤

蓬島古來無覓處我曹今此得真游

游雨花臺

試扶鳩策上烟霞尚想當年天雨花潮熟野航歸別浦  
雪乾宿鷺點晴沙高連西竺三千界俯眺南陽十萬家  
更欲雲開窮遠目鬱蔥起處認中華

以上鄭峯真隱漫錄

王淮

淮字季海金華人紹興十五年進士累官翰林  
學士孝宗朝拜右丞相兼樞密事薨贈少師諡

文定

題福祐王廟

在蘭溪亭峰之巔祀楚亞父范增

關中失鹿人爭逐一去鴻門不可尋千古英雄死遺恨

封侯廟食亦何心

湧幢小品

莫濟

濟字子齊吳興人紹興十五年進士甲戌中宏

詞科官祕書

次韻梁尉秦碑

并序

秦會稽石刻唐人如張守節司馬貞皆嘗援以證史  
記紹興初舅氏姚令威刪定登山弔古見碑石猶存  
後二十餘年分教是邦以語簽判王龜齡勉邑尉梁  
君求之則石已缺字不可見矣以詩記其事龜齡既  
賡之以濟首發其端書以示濟按會稽秦頌德碑凡  
二百九十六字視秦世秦山之朶諸刻獨此碑字為  
最多唐李嗣真云斯小篆之精古今妙絕秦望諸山  
及皇帝玉璽猶千鈞強弩萬石洪鐘豈徒後學之宗

匠亦是傳國之遺寶周越法書苑獨載封禪碑數十字而已至歐陽公趙德父集錄天下金石遺文殆盡亦不復有秦望山碑姚令威紀鵝鼻山頂石屋所插一碑今古屋故在碑蓋無有梁次張所模片紙指為秦碑乃在何山其去鵝鼻尤為隔絕盡記本末以俟後之君子

六王失國四海歸秦皇東刻南巡碑法因史籀有增減名與蒼頡爭飛馳自言功德可歌頌黔首箇箇愚無知

海神何故獨拒命風濤塞路蟠蛟螭羣臣諂佞仙藥遠  
死生治亂分兩岐山靈不可守碑記片段應作龜林支  
陵谷雖存世代異耳目雙被誕者欺只餘紙本落人世  
千古遺臭東南崖我聞秦望最高峻城域所見非昔時  
何山距縣四十里符合傳記壯且奇衆峰乃是子孫行  
古木幾換蛟龍枝指東作西未足怪父老流傳從小兒  
政如塗山玉帛會漫不可考歲久之梁君吏隱年甚少  
鬱鬱寸角初解廩裏糧挈榼訪古跡氣味蕭散如分司

忽聞片石在絕頂小篆無乃斯翁為手披荆棘訶虎兇  
拄杖直叩山頭皮糝糊豈復有字畫此物及見秦亂離  
當時威勢振天下不言慘毒民嗟咨乘輿所至為刀鋸  
方嶽何暇安禮儀關中屢弃百二險歷數浪指億萬期  
君臣乃爾自賢聖鯁論不復相瑕疵陳迹安知百世後  
樵夫牧子笑脫頤興亡俄頃三嘆息撫掌重閱太史辭  
假使玉筋餘筆畫文過其實世所嗤早知金石不可恃  
相君應悔燔書詩

雲門志畧



鄭耕老

耕老莆田人紹興十五年進士國子監簿分教

四明

句

開懷溪一曲養拙屋三間

題木蘭溪書堂

興化府志

湯思退

思退字進之青田人紹興十五年中宏詞科歷

相兩朝官至特進觀文殿大學士左僕射封岐

國公隆興初責居永州卒

詠石僧

雲作袈裟石作身巖前獨立幾經春有人若問西來意  
默默無言總是真

湖海新聞宋高宗一日坐寢殿湯丞相思退侍  
立上曰卿家處州有何異迹思退曰臣鄉有石  
僧題詠云云遂大稱旨本無此詩徹夜遣人歸  
刻石石僧之旁

句

虞妃從梧野啟母祔稽山

二老堂詩話湯岐公顯仁皇后挽詩云云顯仁  
初以賢妃從徽宗北狩其後祔葬徽宗永祐陵  
虞妃為徽宗也啟母為高宗也用事可謂的切

## 林仰

仰字少瞻候官人紹興十五年進士終朝奉郎

## 桃源洞

深樹冥冥一徑風溪流應與十洲通仙家日月無人識

只愛桃花三月紅

天台山志

## 鄒定

定字應可奉新人紹興十五年進士官奉議

楊誠齋云定詩上邇山谷以入少陵戶牖

過杜工部祠

疇昔哦詩憶耒陽茲因奉檄過祠堂一生忠義孤吟裏  
千載淒涼古道旁自是風霜侵病骨非干牛酒浣詩腸  
明朝解纜秋江上問訊先生一瓣香

詩人玉屑

汪大猷

大猷字仲嘉思溫之子紹興十五年進士官至

吏部侍郎兼權尚書慶元中進敷文閣學士與甥陳居仁樓鑰並居翰苑人稱舅甥三學士有適齋存橐

和姜梅山

投分雖深迹卻疎君居東婺我西湖兒曹方喜承毛檄

父執應容教鯉趨慨念舊遊多宿草

舊同官六十餘人今惟大猷與公獨

存僅餘二老見霜鬚詩來喚起相思夢又向梅山得楷

模

鄞縣志

楊 僕

僕字子寬崞縣人居臨安和王存中之子紹興十五年進士仕至權工部侍郎

紹興己巳遊洞霄

青山九鎖隔凡緣福地潛通小有天古洞落花春寂寂  
空山亂石水涓涓金丹翠箬藏千歲芝草琅玕定幾年  
惆悵何時謝塵事山中長作地行仙

洞霄詩集

王剛中

剛中字時亨樂平人紹興十五年進士孝宗  
朝累官禮部尚書端明殿學士同知樞密院  
事卒贈光祿大夫諡恭簡有東溪集

彌牟鎮八陣圖

我稽八陣圖規模載方冊竭來鎮西川夔門觀壘石  
賦詩數百字字字究來歷進涉漢川西彌牟鎮之北  
平原列堆阜灘石同一式細思作者意孔明有深策  
高岸或爲谷灘石存遺跡滄海變桑田平原猶可覓

故令兩處存千載必一得再歌遂成篇當有智者識  
成都文類

楊汝南

汝南字彥侯龍溪人紹興十五年進士初調贛  
州教以薦知古田縣

夜宿龍頭

江流如箭路如梯夜泊龍頭煙靄迷兩角孤雲天一  
握曉光不覺玉繩低

漳州府志



黃徹

徹字常明莆田人紹興十五年進士官辰州有  
碧溪詩話

句

但遣一枝居巧婦不殊大厦供嘉賓

碧溪詩話予題友人居云云蓋用爾雅注鵲鶴俗呼巧婦炙穀子雀一名嘉賓

圓冠思得多于鯽刻木惟宜少似彪

碧溪詩話北夢瑣言載江陵在唐世號衣冠薮澤琵琶多如飯甌措大多如鯽魚退之酬崔少

府伊陽詩云下言人吏稀惟足彪與賤余官辰溪時士人皆可喜而不多得近城人虎雜居戲為對云

鄭伯熊

伯熊字景望永嘉人紹興十五年進士累授太子侍讀宗正少卿諡文肅有集

赤城志鄭伯熊為黃巖尉人呼為石蓮縣尉以其年少而堅不可殫也

枕上

飄風不崇朝驟雨不終日清寒入絺綌御衿有餘鬱天

時不能調人事那可必清燈耿孤窗萬籟助颼颼憂愁  
從中來起坐髮屢櫛丈夫屬有念功名乃餘物突兀萬  
間屋此意何時畢長吟荅寒蛩四壁轉蕭瑟

東甌詩集

### 周麟之

麟之字茂振海陵人紹興十五年進士中宏詞科  
擢知制誥翰林學士終于知樞密院事有海陵集  
以珠子香建茶寄皖公山馬先生

筠谷珠璣北苑春寸誠千里託靈芬為投白鹿岩前客何

日容分半席雲

海陵集

董德元

德元字體仁永豐人少魁鄉舉累試禮部不第  
就特奏名補文學初任寧遠簿復預漕司薦紹  
興戊辰試禮部合格遂為第一秦檜援引至參  
知政事檜死以言章罷歸廬陵

登第報家人

御筆封題墨未乾君恩重許拜金鑾故鄉若問登科事

便是當初老榜官

獨醒雜志廬陵之俗謂特奏名為老榜初體仁既預漕舉謁一達官于東上之資達官語坐客有老榜之語體仁頗不能平故其詩及之

尤 袤

袤字延之無錫人紹興十八年進士累遷樞密院正兼左諭德孝宗朝進權禮部侍郎直學士院光宗朝除禮部尚書卒諡文簡嘗取孫綽遂初賦以自號光宗書扁賜之有遂初小橐梁溪

集

方萬里跋宋中興來言詩必曰尤楊范陸誠齋  
時出奇峭放翁善為悲壯公與石湖冠冕佩玉  
度騷婉雅

落梅

清溪西畔小橋東落月紛紛水映紅  
五夜客愁花片裏  
一年春事角聲中歌殘玉樹人何在  
舞破山香曲未終  
卻憶孤山醉歸路馬蹄香雪襯東風

劉屯田墓壯節亭

劉名渙字凝之

西澗當年卜考槃，便于神武挂衣冠。後生無復知前輩，故老猶能說長官。三尺荒墳埋玉冷，百年壯節倚天寒。表章賴有羣賢力，誰把生芻奠一餐。

玉簪花一名鷺鷥

一種幽花迥出塵，孤高恥逐豔陽辰。瑶枝巧插青鸞扇，玉蘂斜敲白鷺巾。難與松筠爭歲晚，也同葵藿趁時新。西風昨夜驚庭綠，滿院清香惱殺人。

送吳待制守襄陽

待制名環，吳珣之弟。高宗吳后之姪。

方持紫橐侍西清忽領雄藩向外行誰謂風流貴公子  
甘為辛苦一書生詞源筆下三千牘武庫胸中十萬兵  
從此君王寬北顧山南東道得長城

以上梁溪遺藁

淮民謠

東府買舟船西府買器械問儂欲何為團結山水寨寨  
長過我廬意氣甚雄麗青衫兩承局暮夜連句呼句呼  
且未已椎剝到難承供應稍不如向前受笞箠驅東復  
驅西棄卻鉏與犂無錢買刀劍典盡渾家衣去年江南



荒趁熟過江北江北不可往江南歸未得父母生我時  
教我學耕桑不識官府嚴安能事戎行執槍不解刺執  
弓不能射團結我何為徒勞定無益流離重流離忍凍  
復忍飢誰謂天地寬一身無所依淮南喪亂後安集亦  
未久死者積如麻生者能幾口荒村日西斜破屋兩三  
家撫摩力不給將奈此擾何

三朝北盟會編紹興三十一年金人傾國而入  
寇嘗以淮南置山水寨擾民秦興縣令尤袤竊  
哀之作淮民謠

庚子歲除前一日遊茅山

犯寒出行邁值此歲云除剛風駕飈輪送我遊清都華陽第八天仙聖之所居洞房劣容人中寬如室廬橫前大谿水于焉限塵區其右萬石林錯落空翠圖茅菴著深秀細路緣崎嶇幽泉見客喜頗亦類逃虛山深日易曛捷徑趨元符琳宮照金碧天籟鳴笙竽側睨白雲峰前瞻赤沙湖金壇聳百丈陰洞通七塗俯視人間世擾擾真蟲蛆早以卑陋質忝分赤城符豈悟夙昔緣復造

神霄墟平生夢寐處恍若登華胥歸來拜綠章足力尚有餘珍館十六所安能徧遨娛窮探恨不盡太息仍躊躇

茅山志

遊張公洞

并序

舟次湖汊侍季父伯兄遊洞靈步行五里夾道皆喬木參天鶴巢其上若欵澗水瀲灩鳴聲甚悲殆不類人間也入洞靈宮覽前賢留題徘徊久之由石徑里許達于洞深數十丈磴道險絕俯僂僅可下下寬廣

容數百人大石離立或下聳欲落若劒盾矛戟相撐  
拄或薨連崛起而不斷若虎豹蹲伏俯踞而挐攫  
中有小門持炬乃得入丹竈井曰在焉由石罅而上  
皆亂石怪形無窮其狀旁行屈曲益深遠不可到其  
陽有懸崖滴乳水流澗谷乍細乍大自成宮商橫  
澗得小閣可憩朱藤纏絡崖上丹花簌簌下墜芬芳  
襲人毛髮凜然欲少留而大風作遂歸余遊名山多  
矣茲游最可紀因成五百字貽我同志以備他日觀

覽馬

吾聞荆溪南有地仙所宅十年勞夢想今日著腳歷扁  
舟下湖泱水漲投沙磧結纜小橋旁杖藜從此適平岡  
面陂陁疊嶂堆襍積行行兩三里夾道喬木植其大幾  
合抱其高乃千尺風生萬壑響日照四山赤時搖樹林  
杪忽見屋宇脊宮門何崢嶸古道頗脩直長廊景曠曠  
崩殿人寂寂寥落昔賢題摩挲壁間墨捫蘿上層巔俯  
瞰得深窟危梯交枝撐鳥道穿詰屈投身乍寬閒跼步

仍偪窄攀援愁顛躋傲睨驚險僻懸崖朶頰亂石拱  
劒戟白雲何時橫乳溢或自滴正中空瀕洞了不見天  
隙冥行迷近遠偃僂猶擿埴巉巖豈人工隱軫入地脈  
窻幽或篝火俯跪僅容席仙壇尚故處丹竈儼遺跡山  
蟲鳴唧唧野鼠聲嘖嘖傳聞老父語以往真莫測中有  
白玉堂橫絕巨石塞傍連洞庭野欲去不可極潛窺目  
先旋縱走膝無力遭迴步仄徑突兀出峭壁樅風高枝  
膠藤蔓青陰暮芳草何芊綿丹花亦狼藉躊躇古亭上

頽仰幽澗碧丁當下流水磊砢欲落石雖云培塿高氣  
與嵩華敵其南有空穴澹瀕殷幽黑陰風訝谷吐冷氣  
森噴逼蛟龍久伏藏金玉閤簡冊靈蹤信茫昧幻怪紛  
慘戚將無神物守欲與世壤隔平生丘壑志早歲泉石  
癖豈不思三山所恨無六翮樂哉茲晨遊逸興潛有激  
仙翁在何許綠髮尚如昔髣髴笙簫聲徘徊鸞鶴翼俗  
緣磨不盡塵境坐形役何當築衡茅幽討窮日夕風雨  
西北起天地忽改色倉皇促歸旆造物豈戲劇良遊易

乖忤真賞難再得寄語山中人重來儻相識

荆溪外紀

重登斗野亭

在江都邵伯鎮梵行院之側

野色涵空濶平蕪接渺瀰江淮天設險星斗地分維  
木千年意滄波萬古悲老僧猶好事見客索題詩

揚州府志

題米元暉瀟湘圖

萬里江天杳靄一村煙樹微茫只欠孤篷聽雨恍如身  
在瀟湘

淡淡曉山橫霧茫茫遠水平沙安得綠蓑青笠往來泛



宅浮家

郁氏書畫題跋記

句

去年江南荒趁逐過江北江北不可往江南歸未得

無題

胸中襞積千般事到得相逢一語無

寄友

送客漸稀

人漸遠歸途應減西三程

台州秋滿歸

後村詩話

雍有容

有容字德裕

資州盤石縣人紹興十八年進士

富樂山

在巴

西

縣東

昭烈

自

荆州

入

蜀

劉璋

延之

于此山

望見

蜀之

全盛

飲酒

樂甚

故得

名

欽定四庫全書

宋詩紀事

十四

當時四海一皇叔至此已堪悲失脚出語翻為樂國想  
是人止可偏方著大漢曾封隆準翁聞道山河錦繡中  
安能鬱鬱久居此睥睨三秦日欲東

方輿勝覽

陳天麟

天麟字季陵宣城人紹興十八年進士累官集

賢殿修撰歷知饒州襄陽贛州鎮江有櫻寧居

士集

登上嶺遊黃山

朝陽滉漾水朦朧  
曉烟橫抹天微風  
三十六峰不著色  
點綴淡墨排秋空  
小山連延大山倨  
林深無人但雲樹  
平生愛山真成癖  
我以意行本無住  
黃山之路何敢危  
黃山之溪何漣漪  
登山度水亦勞止  
正要行役發吾詩  
仙家與世不相遠  
徑入桃源亦良便  
向來父老亦嘗行  
竹籜桃花大于扇

黃山志

石壁道中

雲山疊疊石齒齒  
山色溪聲三十里  
霜餘木葉半丹青

道上松風雜宮徵捨車而徒度險艱邇來趼足愁躋攀  
官閒無祿與王事不妨拄杖對潺湲

旌陽道中

山邑無郵傳農夫半甲兵石樓橫斷岸草徑入荒城聞  
道甘泉駕將臨細柳營風塵何日靜留眼看昇平

勝因寺

山行詰曲到禪林臺殿丹青歲月深薄晚春寒生几席  
逼人空翠撲衣襟客塵冉冉凌清思俗狀紛紛費苦吟

若得一丘容我老便攜藜杖事幽尋

風玉亭

夜聞騷屑此君語晨起急登風玉亭一笑相逢珍重別  
不隨人改舊時青

以上寧國府志

呂城舟行晚晴

楊柳隄長月一灣芙蓉花小蓼初斑孤帆白鳥無邊水  
殘日斷雲何處山遠客自應歸興動新詩都在晚晴閒  
功名有底催人去只合漁樵作往還

宛雅

葉衡

衡字夢錫婺州金華人紹興十八年進士孝宗  
朝拜右丞相兼樞密使責授安德軍節度使郴  
州安置復官與祠

句

水花分塹弱山木抱雲稠更宿招提境還同惠遠遊

鹿田

寺集杜 謝翱金華遊錄

石才孺

才孺字伯元鄭州管城人紹興十八年進士

青陽驛

在順政縣東

幸蜀奔波為祿兒聞鈴夜雨有餘悲青陽一夕難高寢  
黼幄千官減盛儀

方輿勝覽

莫汲

汲字子及吳興人濟弟紹興十八年進士為學  
官以言獲罪南遷石龍

談鑰吳興志莫礪字彥輔君陳之子有子曰伯  
鎔字器之年五十即歸休以迎師教子為事子

三人曰濟曰汲曰沖皆有峻聲擢進士第時號  
三莫後濟沖又中博學宏詞科

石龍泛海作

一颿點破碧落界八面展盡虛無天  
柁樓長嘯海波闊

今夕何夕吾其仙

齊東野語石龍地並海子及素負邁往之氣暇  
日具大舟招一時賓友之豪泛海以自快將至  
北洋海之尤大處也舟人畏不敢進子及大怒  
脅之以劍不得已從之及至四顧無際浪涌舟  
掀簸如拮擗見三魚皆長十餘丈浮弄日光衆  
皆戰慄不能出語子及命大白連酌賦詩數絕  
興盡乃返



芮 瞻

瞻字國器一字仲蒙烏程人紹興十八年進士

歷官御史司業祭酒卒呂東萊再娶乃其女也

董斯張吳興備志芮國器官左從郎仁和縣尉  
嘗和沈長卿壯丹詩云寧知漢社稷變作莽乾  
坤秦檜惡之生竄化州檜死始召還

從沈文伯乞娑羅樹碑

楚州淮陰娑羅樹霜露榮悴今何如能令草木死不朽  
當時為有北海書荒碑雨侵澀苔蘚尚想墨本傳東吳

容齋四筆

題鶯花亭

人言多技亦多窮  
隨意文章要底工  
淮海秦郎天下士  
一生懷抱百憂中

後村詩話秦少遊常謫處州後人摘柳邊沙外  
詞中語為鶯花亭題詠甚多

羅浮寶積寺

木落天寒山氣沈  
年華客意共蕭森  
偶于佳處發深省  
其實宦遊非本心  
紅日坐移鐘閣影  
白雲閑度石樓陰

還家莫話神仙事老不寬人雪滿簪

瀛奎律髓

尚輝

輝字國瑞國器弟同登紹興十八年進士仕至

尚書

更戴溪亭為興盡亭仍賦詩

溪山之興無時盡興盡名亭意可知出岫孤雲含細雨  
投林宿鳥愛深枝風流已是十年事公案今成七字詩  
短棹悠然隨所適人生出處要如斯

劉錄

宋詩紀事卷四十七

欽定四庫全書

宋詩紀事卷四十八

錢塘厲鶚撰

朱子

諱熹字元晦一字仲晦世為徽州婺源人父韋  
齋先生松宦遊建陽之考亭遂家焉紹興十八  
年中王佐榜進士寧宗朝歷官寶文閣待制偽  
學禁起落職奉祠卒累贈寶謨閣直學士諡曰  
文理宗朝贈太師追封徽國公從祀孔子廟庭

曾結草堂于建陽蘆峰之雲谷扁以晦菴亦號  
雲谷老人既又創竹林精舍更號滄洲病叟最  
後因筮遇遯之同人更名遯翁有文集

齋居感興二十首

并序

存十首

余讀陳子昂感寓詩愛其詞旨幽邃音節豪宕非當  
世詞人所及如丹砂空青金膏水碧雖近乏世用而  
實物外難得自然之奇寶欲效其體作數十篇顧以  
思致平凡筆力萎弱竟不能就然亦恨其不精于理

而自託于仙佛之間以為高也齋居無事偶書所見  
得二十篇雖不能探微索眇追迹前言然皆切于日  
用之實故言亦近而易知既以自警且以貽諸同志  
云

崑崙大無外旁薄下深廣陰陽無停機寒暑自來往皇  
犧古神聖妙契一俯仰不待窺馬圖人文已宣朗渾然  
一理貫昭晰非象罔珍重無極翁為我重指掌

人心妙不測出入乘氣機凝冰亦焦火淵淪復天飛至

人秉元化動靜體無違珠藏澤自媚玉韞山含暉神光  
燭九垓懸思徹萬微塵編將寥落歎息將安歸

靜觀靈臺妙萬化此從出云胡自蕪穢反受衆形役厚  
味紛朶頤妍姿坐傾國崩奔不自悟馳騖靡終畢君看  
穆天子萬里窮轍跡不有祈招詩徐方御宸極

涇舟膠楚澤周網已陵夷況復王風降故宮黍離離至  
聖作春秋哀傷實在茲祥麟一以踣反袂空漣洏漂淪  
又百年僭侯荷爵珪王章久已喪何復嗟歎為馬公述



孔業託始有餘悲拳拳信忠厚無乃迷先幾

東京失其御刑臣弄天綱西園植姦穢五族沈忠良青  
青千里草乘時起陸梁當塗轉凶悖矢精遂無光桓桓  
左將軍仗鉞西南疆伏龍一奮躍鳳雛亦飛翔祀漢配  
彼天出師驚四方天意竟莫回王圖不偏昌晉史自帝  
魏後賢盍更張世無魯連子千載徒悲傷

晉陽啟唐祚王明紹巢封垂統已如此繼體宜昏風塵  
聚瀆天倫此晨司禍凶乾綱一以墜天樞遂崇崇淫毒

穢宸極虐焰燔蒼穹向非狄張徒誰辦取日功云何歐  
陽子秉筆迷至公唐經亂周紀凡例孰此容侃侃范太  
史受說伊川翁春秋二三策萬古開羣蒙

放勛始欽明南面亦恭已大哉精一傳萬世立人紀猗  
歟歎日躋穆穆歌敬止戒癸光武烈待旦起周禮恭惟  
千載心秋月照寒水魯叟何常師刪述存聖軌

顏生躬四勿曾子曰三省中庸首謹獨衣錦思尚綱偉  
哉鄒孟氏雄辨極馳騁操存一言要為爾挈裘領丹青

著明法今古垂煥炳何事千載餘無人踐斯境

飄飄學仙侶遺世在雲山盜啟元命秘竊當生死關金鼎蟠龍虎三年養神丹刀圭一入口白日生羽翰我欲往從之脫屣諒非難但恐逆天道偷生詎能安

西方論緣業卑卑喻羣愚流傳世代久梯接凌空虛顧盼指心性名言超有無捷徑一以開靡然世爭趨號空不踐實躋彼榛棘塗誰哉繼三聖為我焚其書

以上大全集

贈上封諸老

夜宿上封寺  
翛然塵慮清  
月明殘雪裏  
泉溜隔松聲  
楮衲今如許  
綈袍那復情  
爐紅虛室煖  
聊得話生平

醉下祝融峰

我來萬里駕長風  
絕壑層雲許盪胸  
濁酒三杯豪氣發  
朗吟飛下祝融峰

路出上背仰見上封寺  
遂登絕頂聯句

同張敬夫  
林擇之

我尋西園路  
徑上上封寺  
竹輿不留行  
及此秋容霽  
磴危霜葉滑  
林空山果墜  
崇蘭供清芳  
深壑遞幽吹  
不知

山益高但覺冷侵袂路回屹陰崖突兀聳蒼翠故應祝  
融尊羣峰拱而峙金碧雖在眼勇往詎容憇絕頂極遐  
觀腳力聊一試昔遊冰雪中未盡登臨意茲來天宇肅  
舉目淨纖翳遠邇無遁形高低同一視永惟元化功清  
濁分萬類運行有機緘浩蕩見根柢此理復何窮臨風  
但三喟

自上封登祝融峰絕頂聯句

衡岳千仞起祝融一峰高羣出畏突兀奔走如曹逃我

來雪月中歷覽快所遭  
捫天滑青壁俯壑崩銀濤所恨  
無十牻一掣了六鰲  
遄歸青蓮宮坐對白玉毫重閣一  
徙倚霜風利如刀平生山水心真作貨食饗明朝更清  
徹再往豈憚勞中宵撫世故劇如千蜎毛嬉游亦何益  
歲月今滔滔起望東北雲茫然首空搔

以上南岳倡酬集

寄劉珙胡憲一絕

先生去上芸香閣

胡閣

老新栽獬豸冠

劉除御史

留取幽

人臥空谷一川風雨要人看

翠屏筆談

九日登天湖分歸字韻

去歲瀟湘重九時滿城寒雨客思歸故山此日還佳節  
黃菊清樽更晚暉短髮無多休落帽長風不斷且吹衣  
相看下視人寰小祇合從今老翠微

詩林萬選

次陸子靜韻

德義風流夙所欽別離三載更關心偶扶藜杖過寒谷  
又枉籃輿度遠岑舊學商量加邃密新知培養轉深沉  
只愁說到無言處不信人間有古今

庶齋老學叢談  
復辨論無極鵝湖倡和尤見旨趣象山詩云墟墓生哀宗廟欽斯人千古最靈心涓流積至滄溟水孝石崇成太華岑簡易工夫終久大支離  
事業竟浮沉欲知自下升高處真偽先須辨古今  
晦菴次韻云云

枕屏秋景

山寒夕飈急木落洞庭波幾疊雲屏好一生秋夢多

遠遊篇

十九歲作

舉坐且停杯聽我歌遠遊遠遊何所至咫尺視九州九州何茫茫環海以為疆上有孤鳳翔下有神駒驤孰能



不憚遠為我遊其方為子奉尊酒擊鉢歌慨慷送子臨  
大路寒日為無光悲風來遠壑執手空徊徨問子何所  
之行矣戒關梁世路百險艱出門始憂傷東征憂暘谷  
西遊畏羊腸南轅犯癘毒北駕風裂裳願子馳堅車躡  
險摧其剛戕戕既不支瑣瑣誰能當朝登南極道暮宿  
臨太行睥睨即萬里超忽凌八荒無為蹙蹙者終日守  
空堂

虞帝廟樂歌

皇胡為兮山之幽翳長薄兮俯清流渺冀州兮何有眷  
茲土兮淹留皇之仁兮如在子我民兮不窮以愛沛皇  
澤兮橫流暢威靈兮無外潔尊兮肥俎九歌兮韶舞嗟  
莫報兮皇之祐皇欲下兮儼相羊烈風雷兮暮雨

以上  
濂洛

風雅

挽沈菊山

愛菊平生不受錢此君原是菊花仙正當地地下修文日  
恰值人間落帽天生與唐詩同一脈死隨陶令葬千年

如今忍向西郊哭東野無兒更可憐

杭州府志沈菊山袁州宜春人由進士知錢唐  
嘗植菊數百本以自樂晚節益堅適以九月九  
日歿朱文公挽之云云

月波臺

潺湲流水注田塘中作平臺受晚涼四面不通車馬跡  
一樽聊飲芰荷香韓公無復吟花島楚客何妨賦葯房  
少待須臾更清徹月華零露洗匡牀

衢州府志月波臺在開化縣金錢山北宋山長  
江天然建朱子過訪作此遺之

德興縣葉元愷家題

蔥湯麥飯兩相宜  
蔥煖丹田麥療飢  
莫道儒家風味薄

隔鄰猶有未炊時

大全集補遺

張祁

祁字晉彥烏江人  
邵弟號總得居士  
以子安國魁多士  
秦檜羅織下獄檜  
死獲免官至淮南  
漕

運判官

荅人覓茶

內家新賜密雲龍，只到調元六七公。賴有家山供小草，

猶堪詩老薦春風。

清波雜志

### 渡湘江

春過瀟湘渡，真觀八景圖。雲藏岳麓寺，江入洞庭湖。晴

日花爭發，豐年酒易沽。長沙十萬戶，游女似京都。

瀛奎律髓

### 題靈仙觀

樓殿起山巔，無塵地自偏。松廊暗雲霧，粉壁豔神仙。名

姓藏丹府，衣冠訪洞天。幼輿立壑質，定合老松泉。

安慶府志

田如鼇

如鼇號癡叟贛州人紹興中左宣教郎知道州

題司馬端衡米元暉詩意卷

萬頃長江水接天中有峰巒聳蒼綠青霄影蘸白蟾蜍  
浩浩澄波晃寒玉少陵詩名冠古今一生苦吟吟不足  
端衡寫作無聲詩留與拙堂伴幽獨

郁氏書畫題跋記如鼇跋云司馬君實米元章  
德行文米皆本朝第一等人恨余生晚不見前  
輩今觀二公墨妙追想終日為之慨然二公非  
畫師何乃精絕至是豈鳳雛驥子其天資超詣

種種自不同乎紹興十八年九月廿六日

沈少南

儲福宮王真公主像

儲福宮在蜀天倉峰下有唐睿宗女王真公主及明皇像

乃公主修真之地有天峰閣望青城山三十六峯如列屏焉

割盡齊封奉魯元更開沁水占名園何如帝子空山外

落日騎驢芳草原方輿勝覽

胡叔豹

儲福宮

棄形如遺但養神阿兄爛醉梨園春人百撼之耳不聞  
何物女子乃獨醒徑來空山臥白雲不見漁陽胡馬塵  
方輿勝覽

歐陽鈇

鈇字伯威號寓菴廬陵人少與周益公同場屋  
連戰不利篤意于詩有脞辭集

絕句

戀樹殘紅溼不飛楊花雪落水生衣年來百念成灰冷



無語送春春自歸

桑麻得雨更青蔥芍藥留春結晚紅  
怪得鳥聲如許好此身還在亂山中

為憐紅杏亞枝斜看到斜陽送亂鴉  
又是一春窮不死天教留眼看鶯花

蓬窻臥聽疎疎雨卻是芭蕉夜半聲  
烟浪蔽天天倚蓋畧容一點白鷗明

示二子

先君以官貧我乃遺以安但願兩兒健扶持一翁孱何  
須待門生悠然柴桑閒

游愚堂

聞說名園尚脩竹花壓頽垣筍穿屋雨痕半掩壁間題  
飢鼠跳梁狐晝啼前人已為後人笑後人更使誰人悼  
嗚呼全盛幾時柰衰何古來興廢何其多

以上詩人王  
屑

禾山秋興

生計嗟烏有誰人問子虛西風五更雨南雁數行書衰

朽兒童笑飄流歲月餘秋深新病起吾志在吾廬

夜起集萬感胡為淹此留詩成夔子國人在仲宣樓絡  
緯聲中淚芭蕉雨裏愁遙知屢門倚應念有方游

以上詩林

萬選

句

細雨雙飛鷺寒蓑獨釣船 誰知花過半纔與酒相尋  
故人驚會面新恨說從頭 天上張公子人間陸士龍  
夢回千里外燈轉一窗深 月白元猿哭更殘絡緯悲

語離遽如許話舊復何時 風色似傳花信到夕陽微  
放柳梢明 巷南巷北人招飲一雨一晴花耐看有  
客過門湖海士隔籬呼酒吐嗟閒 夢回金馬玉堂上  
文在冰甌雪椀中 青山如故情非故芳草喚愁詩遣  
愁 擾擾征人相顧語蕭蕭落木不勝秋 千里歸來  
人事改十年猶幸此身存

晁公休

詩人玉屑楊誠齋跋云鳥啼花落欣然會心處  
酌大白然伯威詩欲取風騎氣也

公休公武之兄

夏日過莊嚴寺僧索詩為留絕句拉舍弟同賦  
十里溪橋梵宇新那知陌上漲紅塵老僧苦要題名姓  
不道林泉皆故人

病起支離倚瘦筇幅巾芒屨竹陰中聞蟬未有驚人句  
且受禪牀一榻風

成都文類

晁公武

公武字子止鉅野人沖之之子秦檜辟為四川

總領財賦司幹辦公事乾道中以敷文閣直學  
士為臨安府少尹有郡齋讀書志昭德文集

夏日過莊嚴寺僧索詩為留絕句

笑脫塵衫撲軟紅杖藜徙倚水光中最憐林葉深深處  
遮盡斜陽不礙風

出門散策烟棲樹歸路扶輿月蛻雲十里江村入圖畫

野橋沙路杳難分

成都文類

遊焦山

江勢東傾劇建瓴中流巖壑隱禪局遊僧誰渡降龍鉢  
過客爭摸瘞鶴銘脩竹捎雲淩北固桃花吹浪漲南溟  
上人勸賦斯山境乞與微吟勒翠屏

京口三山志

### 登金山

東游尋勝即登臨浮玉知名冠古今萬壑波濤喧海口  
千年巖岫據江心雨篷烟棹征帆遠曉磬昏鐘佛屋深  
詩客分留風景在憑君一為發長吟

金山志畧

### 晁公遡

公遡字子西公武之弟有嵩山集

秋江

秋江水清不勝綠  
還與漢江顏色同  
望中白鳥忽飛去  
落日丹楓相映紅

詠瓶中梅

折得寒香日暮歸  
銅瓶添水養橫枝  
書窓一夜月初滿  
卻似小溪清淺時

感事



征衣消盡洛陽塵  
泣向東風拭淚痕  
不及青春歸有信  
一年一到樂遊園

有感

不見罌罍闕于今  
已十春素衣不忍  
棄為有洛陽塵

以上

嵩山集

合江舟中作

雲氣昏江樹春流沒釣磯  
如何連夜漲似欲送人歸  
亂石水聲急片帆風力微  
舟師且停櫓白鷺正雙飛

成都文類

吳說

說字傳朋錢唐人廣陵王逢原之外孫官至郎

中

樓大防云錢唐吳傳朋游絲字前無古人

酬次李辰甫所寄三首

近知畫室入烟霞兒女甘貧慣食鮭方外何人差可友  
歲闌底處定為家江城潮盛漫秋鹵驛道風高捲霽沙  
子拾墮樵歸未得能無借地種桃花

桐花竹實幾時生桑野秋枯繭未成  
冝信飢寒能累道

唯餘寂寞許尋盟年顏已媿神仙事江海難忘故舊情  
何日往來同井徑清談清坐到天明

扁舟東下初乘興明月南飛竟失羣田父語言時近道  
世人嘲笑尚論文九山歛氣橫寒野一塢朝陽聚暖雲  
勝處借人教暫看後來何必問靈氛

見真蹟詩帖

### 題仙都山

佳處從來說鼎湖茲游直欲到清都參天玉筍千尋許  
墮地金蓮十丈無江觀便思眠一柱海山今喜識方壺

直須買取鵝溪絹要畫滄洲水墨圖

仙都山志

吳環

環高宗吳后姪以待制帥襄陽歷少師致仕贈

永安郡王

句

飽看七寶山頭月慣聽三茅觀裏鐘

瀛奎律髓

曾慥

慥字端伯晉江人孝寬曾孫丞相懷之從兄官

尚書郎直寶文閣奉祠閒居銀峰集百家類說  
凡六百二十餘種自號至游居士

白帝城

白帝城頭路逶迤一徑遙高堂臨峽尾  
瀑水沒山腰隔岍漁施網橫江鐵貫橋  
神妃翻覆手願賜雨連宵

全蜀藝文志

志

題蘇養直詞翰軸後

元祐文章絕代無為主盟者眉山蘇  
舊聞宗匠為詩匠

今見東湖說後湖

原注徐師川號東湖居士

寂寞香山老居士浩蕩

烟波古釣徒瀾翻翰墨驚人眼一段清冰在玉壺

鐵網珊瑚

### 郭章

章字仲達崑山人少入太學以守城恩拜官被  
知已薦居帥幕久之官至通直郎

### 歸省賦別同舍

菽水年來屬未涯羞騎款段出京華漲塵回旋風頭緊  
綺照支離日脚斜掠過短莎驚脫兔踏翻紅葉鬧歸鴉

不堪回首孤雲外望斷淮山始是家

也知隨俗調歸策卻憶當年重出關豈是長居戶限上  
可能無意馬蹄間中原百甓知誰運今日分陰敢自閒  
儻有寸功裨社稷歸來恰好試衣斑

中吳紀聞

方豐之

豐之字德亨莆田人監豐國鎮及與呂紫薇交  
游陸放翁序其詩

歷崎道中

漠漠春陰接海低  
濛濛晚雨傍山飛  
半鼓古埭無人過  
時有村童護鴨歸

後村詩話

章淵

淵字伯淵惇之後用蔭入仕不就卜居長興之  
若溪有槁簡贅筆

子夜吳歌

并序

齊梁以來江南樂府詞多采方言用之穩帖不覺為  
俗語吳中下里之曲有云消梨應郎心上冷甘蔗應



郎心上甜又云羅帍十二褶小妻也是妾皆有類樂府詞余因為子夜吳歌二章云

消梨得能冷甘蔗復能甜總應郎心上為儂素比縑

桃根復桃葉羅帍十二褶阿郎歡自濃小妻也是妾

稿蘭

贊筆

### 妙庭觀

桃花流水小橋斜古觀臨溪翠竹遮聞道雙成有遺跡

欲求金鼎看丹砂

杭州府志

曾協

協南豐人肇孫以詞賦魁胄監終于知永州有

雲莊集

芭蕉

炎蒸誰解喚清涼扇影搖搖上竹窓準擬小軒添睡美

夢成風雨夜翻江

全芳備祖

康執權

執權官待制奉祠寓居永嘉

戲為妓山氏作

昔日緹縈亦如許  
盡道生男不如女  
河陽滿縣皆春風  
忍使梨花偏帶雨

庚溪詩話永嘉籍妓中有山姓者頗慧麗康時命之侑尊一日妓之父以事繫縣當坐罪妓涕泣歷求救于士大夫康憫之戲為一絕云云明日妓詣縣投狀乞代父罪且連此詩于狀前邑宰笑而釋之

曾季狸

季狸字裘父號艇齋南豐人文定公弟宰之孫

大理司直晦之子再舉進士不第師事韓子蒼  
呂居仁又與朱晦翁張南軒書問往復郡守張  
孝祥樞密劉珙薦皆不起有艇齋雜著

陸放翁序文辭簡遠讀之者遺聲利冥得喪如  
見東郭順子悠然意消然可傳之作尚不止此  
遺珠棄璧識者興歎屬郡博士趙去華訪其遺  
集以補之

秦女行

并序

靖康間有女子為金人所掠自稱秦學士女在道中  
題詩云眼前雖有還鄉路馬上曾無放我情讀之者

悽然余少時常欲紀其事因循數十年不克為之壬辰歲九月因讀蔡琰胡笳十八拍慨然有感于心乃為之追賦其事號秦女行云

妾家家世居淮海郎罷聲名傳海內自從貶死古藤州門戶凋零三十載可憐生長深閨裏耳濡目染知文字亦嘗強學謝女詩未敢女中稱博士年長以來逢世亂黃頭鮮卑來入漢妾身亦復墮兵間往事不堪回首看飄然一身向邊垂被驅不異犬與雞奔馳萬里向沙漠

天長地久無還期北風蕭蕭易水寒雪花席地經燕山  
千杯濁酒安能醉一曲琵琶不忍彈吞聲飲恨從誰訴  
偶然信口題詩句眼前有路可還鄉馬上無人容我去  
詩成吟罷只茫然豈意漢地能流傳當時情緒亦可想  
至今聞者猶悲酸憶昔中郎有女子亦陷虜中垂一紀  
暮年不料逢阿瞞厚幣贖之歸故里惜哉此女不得如  
終竟老死留穹廬空教詩語傳悽惻不減胡笳十八拍

梅堯詩話

金沙寺

古寺同真率君家更秩筵酒杯無算飲橘樹不論錢勝  
日攜佳客曾來是去年莫嫌頻至此直為主人賢

宿正覺寺

古寺荒涼甚秋風更颯然殿焚猶有礎僧老不知年但  
可扶藜至無因假榻眠鐘魚久寂寞誰施一囊錢

疎山道中

在金谿縣西南

村深谷鳥近人鳴暮靄收時雨又晴極目春山隨處好

筍輿穿盡綠陰行

江南九月未飛霜木葉蕭蕭已半黃行徧疎山山下路  
滿山惟有桂花香

雲谷山

城東三十五里有山曰芙蓉巨筍伯子臨川記云巖內有石人生盤石上體塵則風潤

則雨晴則瑩潔今曰東巖嶺其東南為雲谷諸  
峯連抱如障多石其上祀三仙曰隱真觀有謝  
靈運墨池

舊聞伯子記已得雲谷名隱然望此州奇勝稱山靈懸  
崖瀉瀑布如高屋建瓴喬松數十丈下有千歲苓仄足



行鳥道勢欲搏青冥仙事雖渺茫幽討未忘情高秋八月後擇勝來經行黃冠三兩人淡然亦忘形烟霞到几席爽氣來戶庭瘦筇閑指點老瓦同注傾慙非換鵝手不敢臨黃庭或可聯石鼎未必讓彌明重陽無十日黃菊漸向榮佳哉此天氣一笑未易營但願腳力健年年此尋盟

以上撫州府志

### 韓元吉

元吉字无咎號南澗許昌人維四世孫寓居信

州隆興閒官吏部尚書有南澗甲乙藁

朱子云韓无咎詩作者儘和平有中原之舊  
無南方啁訢之音

晁黃玉林云南澗名家文獻政事文學為一代冠

### 玩鞭亭

黃鬚鮮卑勇無策自馳巴馬來窺賊賊奴但怪日繞營  
起看飛塵已無迹寶鞭不惜棄道旁坐令老嫗知興亡  
百年社稷有天意姦鋒逆燄徒鴟張孤城遺跡森在目  
平湖無復春草綠卻對青山憶謝公父老猶嫌人姓木

邊兵已重朝士輕中原有路何由行  
押中虎兇不可制

江左夷吾浪得名

方輿勝覽

雨中聞伯恭至湖上

莫嫌鞭馬踏春泥  
茶鼎詩囊偶共攜  
山色雨深看亦好  
湖光烟接望還迷  
連天花絮飛將盡  
夾道蒲荷長欲齊  
官事得閒湏洗眼  
蓬壺只在帝城西

送陸務觀福建提倉

觥船相對百分空  
京口追隨似夢中  
落紙雲烟君似舊

盈巾霜雪我成翁  
春來茗葉還爭白  
臘盡梅梢盡放紅  
領畧溪山湏妙語  
小迂旌節上凌風

元注僕為建安宰  
作凌風亭以上

瀛奎律髓

題北齊校書圖

并序

齊文宣天保七年詔樊遜校定羣書供皇太子遜與  
諸羣秀高乾和馬敬德許散愁韓同寶傳懷德顧道  
之季道子鮑長暄景孫及梁王主簿王九元水曹參  
軍周子深等十一人借邢子才魏收諸家本共判定

祕府紕繆于是五經諸史殆無遺闕此圖之所以作也黃太史所謂士大夫十二員今范明州謂逸其半者皆是矣至唐已隔周隋二代不知何自得其形容髣髴邪高氏起索虜以兵力奮然敦尚儒風立石經興黌序定尚書于涼風堂質經義于春宮意當時文士歆豔之故相傳于圖畫哉流及後裔文林之館既興御覽之書既作無愁之聲已播于天下不抹其亡故余感而賦

齊高校讐誰作圖一時紬書亦名儒網羅卷軸三千餘  
俗傳非真類迂愚雌黃是正定不無虛文末學徒區區  
豈識治道通唐虞文林高館希石渠後來御覽嗟何書  
修文偃武事益誣轉頭鄴城已立墟峨冠廣袖長眉鬚  
丹青寫此猶不渝高鬟侍女曳紅裾兩騅帕鞍立奚奴  
罷琴涉筆傾酒壺蘭臺供擬信樂歟不知畫手安用摹  
無乃逞巧聊自娛千年視之一款歐君不見文皇學士  
十八人謀猷事業皆功臣瀛州舊圖應更真請君尋觀

為拂塵

硯北雜誌

隆興甲申歲閏月遊焦山

荒村日晴雪猶積繫纜焦山下石江翻斷崖石破碎  
瘞鶴千年有遺跡瘦藤百級躋上方浮玉南北江中央  
檣竿如林出烟浦酒船遠與帆低昂老鷗盤風舞江面  
殺氣淮南望中見神龍只合水底眠為洗乾坤起雷電  
觀音巖前竹十尋大士不死知此心醉歸更喚殷七七

賸種好花開鶴林

鎮江府志

雲洞

在信州西

揮策度絕壑撐空見樓臺丹崖幾千仞中有佛寺開老  
僧如遠公鷹門走蒿萊下馬問所適褰衣指崔嵬飛闌  
倚石磴曠蕩無纖埃坐久意頗愜爽氣生樽罍仙棺是  
何人蛻骨藏莓苔舉酒一酌之慨然興我懷丹砂固未  
就白鶴何時來不若生前樂長嘯銜此杯

廣信府志

高元之

元之字端叔武烈王瓊之七世孫南渡家明州



五上禮部不第人號萬竹先生有茶甘甲乙橐  
題雪竇飛雪亭

危亭上拂烟霧光蒼崖深到蛟螭穴天河飛來破山翠  
寒入疎林風自發翻珠錯玉無時歇巖前散作千秋雪  
寒聲蕭蕭凜毛髮白雲朵朵翔空滅飛流濺沫入毫端  
天與一詩為題絕

延祐四明志

### 大小晦山

大晦出小晦過盡山峰翠寒雲抱幽谷枯卉老孺瀨沿

流路偏側當道屋破碎卻立重回首瀑布瀉雲背

甬上者舊

集

句

灑窻蠶食葉入竹蟹行沙

娛書堂詩話四明高 endpoint 叔博學能詩鄉里所推重嘗有雪詩一聯云云竟坎壈不仕樓攻媿挽之云弟子皆藍綬先生竟白袍

曾逮

逮字仲躬幾季子仕終敷文閣待制有習菴集

清樾軒

在信州廣教寺即文清所居

開軒在獨園繞屋得清樾不知何年樹殆為今日設  
窻扉落林影時復亂風月喧聲了不聞幽弄極可悅  
玉溪僧所廬無似許明潔頗疑三昧手斷取從三浙  
禪房花木深此語信佳絕何以落其成爐烹薦茗雪

廣信府志

王 鈇

鈇字承可秦檜舅氏王本觀復之子檜薦于朝  
除樞屬仕至貳卿

墨梅

前身姑射冰相似  
今代潘妃玉不如  
坐對真成在江國

淡烟微雨暗扶疎

聲畫集

絕句

津頭短短長長柳  
陌上朱朱白白花  
一段風烟三百里

杜鵑愁絕客思家

錦繡萬花谷

李牧

牧字子牧

次韻曾端伯晚過青山

怪底塵勞破青山在眼中竹橋低跨水林磬小鳴風半  
嶺暮雲碧一村霜葉紅禪枝棲衆鳥回首意無窮

前賢  
小集

拾遺

刁麟游

麟游南徐人失其名以字傳

賦竹馬

小兒騎竹作驂騑猶是東西意未休我已童心無一在

十年渾付水東流

竹坡詩話南徐刁氏子字麟游十歲時作竹馬詩後十歲卒客有志其墓者以比李長吉

張堯臣

堯臣陳留人入南渡

寄洞霄道士王竹菴

一笑相逢已隔秋  
人間多事苦相留  
亂雲有路通仙境  
清夢何因訪昔遊  
白日無情傷老大  
青山此地可藏修  
與君宿有誅茅約  
為卜來賢一室幽

洞霄詩集

何 昞

昞號唯齋

贈竹菴王先生

巾盂宵復聽齋鐘  
隱處何妨作退翁  
一榻但留詩軸伴  
萬緣都付酒杯空  
松顛舞月歸巢鶴  
竹下敲門採藥童  
風定雲眠人不到  
倚闌凝目看飛鴻

洞霄詩集

朱謙之

朱買臣廟

貧賤難堪俗眼低  
區區何事便雲泥  
會稽乞得無他念  
祇為歸來詫故妻

談數嚴州壽昌縣道旁有朱買臣廟其地有朱池村朱謙之詩云云

姚述堯

述堯錢唐人有蕭臺公餘詞

句

簇簇魚鹽喧古市  
聲聲弦誦徧儒家

過青田方輿勝覽

顧發




發字休文崑山人

待潮顧浦宿耕者張欽舍

海近雲氣昏禹跡開茫茫晴林列障邏什伍屯千岡頃  
遭七年旱驟見九秋黃腰鎌喜復悲泥水新圃場縣侯  
初下教官賦無豐荒錯揮製錦刀戲作編氓創身上催  
租癡短褐愁蓋藏課為五邑最薦飛十剡章遂巡掌邦  
計跬步封侯王江淮十萬師待餉正頡吭禾麥今已登  
婦子戒勿嘗行俟天雨粟飽食均四方

崑山雜詠



宋詩紀事卷四十八

欽定四庫全書

集部

宋詩紀事卷四十九

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣牛稔文

謄錄監生臣許紹錦

欽定四庫全書

宋詩紀事卷四十九

錢塘厲鶚撰

林李仲

李仲字懿成永嘉人南渡時太常少卿守婺州

送會稽虞仲琳

虞頗通性理之學

男兒何苦弊羣書學到根源物物無曾子當年多一唯  
顏淵終日只如愚水流萬折心無競月落千山影自孤  
執手沙頭休話別與君元不隔江湖

題赤松山黃初平祠

路轉溪回草木香有人荷笠山之陽  
定知我是金華守  
笑道牧民如牧羊

羽仗霓旌去不還空餘舂水落人間  
至今山下無苦旱  
便是田家九轉丹

以上庚溪詩話

劉無降

遊秀峯寺

曉乘輕舸出江城  
晚上籃輿卻倦行  
盡日松風響巖谷

小窗聽作亂泉聲

吳郡志

聞人武子

武子紹興間人張綱有聞人武子改官制

墨梅

隴首人歸信息稀  
愁看冰楮破寒枝  
瑤姬駐立緣何事

直到霜飛月墮時

聲畫集

王鎬

鎬字從周永嘉人仕至忠州守

移竹後雨

洗紅宰宰烏藍雨落紫颼颼  
阜角風挂起北窗聊問訊

新移來竹定惺鬆

詩人玉屑

句

髮爽帶風梳齒疎和月漱

早行

未知真是岳祇見半為雲

望岳

避喧那厭雨宜睡不思茶

觀橋寓樓

雲學催詩黑風仍

作誦清

將雨

凍雪寒梅雙蠟屐澄江明月一竿絲

紹師覓詩

催租例擾潘邠老付麥誰憐石曼卿

送潘文叔

山色兩間

供步障松陰半畝當郵亭

出春陵

籍通上界神仙府身

見甘泉侍從臣

上何尚書

以上娛書堂詩話

葉采

采字仲圭號平巖

書事

雙雙瓦雀行書案點點楊花入硯池閒坐小窗讀周易

不知春去已多時

瀟洛風雅

陳光道



光道字不矜南城人

夢中贈神女蔡箏娘

十首存四

長恐凡材不合仙  
喜逢神女熟因緣  
雲中隱隱開金鎖  
路入麻姑小有天

海石榴花暎綺窗  
碧芙蓉朶亞銀塘  
青鸞不舞蒼虬卧  
滿院春風白日長

老聃西逝即浮屠  
莫怪窗間貝葉書  
長晒楊妃仙格劣  
卻教鸚鵡誦真如

玉女倚天多喜笑素娥如月與精神假饒不許長年住  
猶勝人間不遇人

夷堅志

### 劉士季

#### 次韻何漕司小紅翠亭

少陵遺蹟滾西東端的高齋在此中今日花枝弄烟雨

前時疏甲卧霜風

自注此地舊為疏畦

根株移取他山翠附

萼輸來別圃紅收拾陽春無盡藏夔人端說兩詩翁

全蜀

藝文志

劉王孟

題呂先生畫像

短褐長條大布巾  
雲霞嚙嗽九天春  
可憐世上屠沽子  
喚作尋常賣墨人

聲畫集

曾揆

揆字舜卿南豐人

題資福院平綠軒

終日勤勞雁鷺行  
偶然來訪贊公房  
扶疎草木四圍合

縈繞溪流一帶長倚檻豈能成傑句把杯多是說名方  
問師乞取安心法宴坐蒲團對佛香

至元嘉禾志

林 歆

吳中寒食

寒食家家蹋曉晴好風吹我出重城幾灣野水迎人白  
數點家山刮眼明已有鴿原聯乘樂何須鷓尾並橈行  
山前父老應相笑為我頻來學送迎

吳郡志

朱明之

崑山慧聚寺

井序

離常熟至崑山泊慧聚寺而詩情尤壯復為二章附  
于五題蓋山雞自愛其尾亦欲以多為貴也

古寺有遠名欲遊先夢生飛猿磴底嘯靈鳥雲間鳴影  
密樓臺衆香繁草樹榮何年照佛火燦燦長光明

石林高月生蘚閣疎磬鳴宿鳥夢難就定僧魂更清香  
風動花影巖瀑飛玉聲遙夜坐來短但餘天外情

吳郡志

胡循

滄浪亭

竄逐本無罪，羈窮向此忘。  
野煙含悵望，落日滿滄浪。  
亂草荒來綠，幽蘭死亦香。  
楚些招不得，秋水似瀟湘。

吳郡志：滄浪亭在郡學之南，積水彌數十畝，旁有小山高，下曲折，與水相縈帶。錢氏時，廣陵王元璩池館，或云近戚中吳軍節度使孫承祐所作。慶厯間，蘇舜欽子美得之作亭，曰滄浪云。

毛 玕

玕字平仲，三衢人。友之子仕至宛陵、東陽二州。

倅有樵隱集

泊釣臺

洲渚寒雲薄暮天  
蕭蕭燈火落帆邊  
嚴陵灘下孤舟遠

一夜歸心聽雨眠

釣臺集

蔡雋

題汀州蒼玉洞

向來曾醉呼猿洞  
亂石崩雲擁坐隅  
誰料七閩煙瘴底

半巖風物似西湖

錦繡萬花谷

鄭子覃

題苔溪道觀壁

紛紛紅雨入蒼苔  
密蔭新成鶯友來  
擬逐幽人夢  
蓬島

一聲裂竹故驚回

苔溪漁隱叢話

周仲卿

月泉

石罅玉為髓  
月梭金作棱  
蒼苔誰鑿破  
白雪自堅凝  
穿豈太山雷  
清于萬壑冰  
此中無六月  
門外氣如蒸

湖州府志月泉在德清縣慈相寺出石罅間形如半月呂東萊疏云斷崖吐月纔出半規古梵



涵星尚懷全壁久矣寶匿之廢時哉玉斧之修  
護此清寒被其氛翳名高詩社再傳和仲之符  
價重帝城復值文饒之運周仲卿有詩

王 宓

宓字德升新淦人困躓場屋入玉笥山依道士  
潘與齡獨居白雲齋十餘年卒

礬山道中

濺石韻寒泉依稀言語處回頭覺無人又上前溪去

山樵

山樵竹裏居畧約纔堪度落日淡平疇牛羊點寒暮

獨醒雜志語意蕭散非遠外聲利者不能也

許志仁

志仁字信叔

寄衣曲

貂裘雖云溫非妾手中迹唯此萬里衣一鍼三歎息歎  
息恐人聞縫時常避人開緘勿嫌浣中有雙淚痕江南  
十月雁初飛邊地纔秋塞草衰衣成妾手君寧見寒到

君邊妾自知寄書問征夫好在何當還西風吹妾夢夜  
度魯陽關

和姚令威春晚即事

卧看遊絲媚遠天起尋幽徑卻茫然句成落絮飛花裏  
心在殘霞夕照邊無復雙魚傳尺素空餘瑟瑟思華年  
年來情味人應笑白首傷春祇醉眠

以上前賢小集拾遺

俞似

似官廣州鈴轄

題英州金山寺壁

轉食膠膠擾擾間  
林泉高步未容攀  
興來尚有平生履  
管領東南到處山

容齋隨筆似妻趙夫人親書此詩于寺壁字畫  
徑四寸道健類薛稷

王度

度字武臣豫章新吳人

句

雲生坐來石風掩讀殘書  
危紅賒晚景漲綠上平沙

鴉分供餘食，鵲亂著殘基。  
樵斧和雲斫，漁蓑帶雪披。

娛書堂詩話：王武臣吟詩有警句，皆清奇可誦。張紫微謝艮齋極稱賞之。

王萊漪

梅

不受塵埃半點侵，竹籬茅舍自甘心。  
祇因誤識林和靖，

惹得詩人說到今。  
西溪叢話

李樸

樸字德邵，廣陵人。

端硯

巖石凝清粹端然絕世珍  
聲清輕楚玉色潤勝燕珉

箋硯

李似權

記夢

碧玉山頭碧玉泉  
琮琤聲裏數流年  
不知曾與何人到  
笑想丹題似昔緣

石壁蒼苔露未乾  
小池射日石團團  
弄泉漱玉歸何暮  
風捲橫雲細細看

能改齋漫錄

俞 疇

疇字叔惠南渡初人

跋山谷書范滂傳帖

貂璫羣雛擅天網手驅名流入鉤黨屯雲蔽日光無  
邪金神器春冰上汝南節士居危邦志剗蕭艾扶蘭芳  
致君生不逮堯舜死合夷齊俱首陽千年興壞真暮旦  
殷鑒詎應如許遠安知後人哀後人又起諸賢落南歎  
宜州老子筆有神蟬蛻顏揚端逼真少模龍爪已名世

晚用雞毛亦絕人平生孟博吾尚友時事駸駸建寧舊  
胸蟠萬卷老蠻鄉獨感斯文聊運肘老子書名橫九州  
一紙千金不當醕此書豈但翰墨設心事恨恨關百憂  
人言老子味禪悅疾惡視滂寧爾切須知許國本精忠  
不幸為滂甘伏節九原莫作令人悲遺墨敗素皆吾師  
從君乞取宜州字要對崇寧黨籍碑

程史

柴中守

跋山谷書范滂傳帖



小春晝日如春晚飲罷披圖清興遠夜光照屋四座驚  
金薤銀鉤真墨本當年太史謫宜州腸斷梅花棲戍樓  
拾遺不逢東道主翰林長作夜郎囚蠻煙瘴雨森鈇鉞  
更值韓盧搜兔窟老色上面歡去心惟有忠肝懸日月  
郡丞嗜好殊世人投箋乞字傳兒孫平生孟博是知己  
筆下寫出精神騫興亡萬古同一轍黨論到頭不堪說  
刊章下郡漢道微清流入河唐祚絕先朝白晝狐亦鳴  
正氣消盡邪氣生殿門斷碑仆未起中原戎馬來縱橫

生蛟入手不敢玩往事淒涼重三歎蘭亭瘞鶴徒爾為

好刻此書禪廟算

程史

### 宗道傳

### 道傳南渡初人

### 伏波巖

日珞按顧氏選本作賈黃中字句小異

銅柱威聲凜百蠻  
骨貪捆載溷溪山  
無人為起文淵問

端的珠還薏苡還

桂勝

### 馬益

益福州通判

奉和蔡公寒食遊二山作

屬吏參陪宴二山金杯滿沃酒腸寬公私不禁三朝火  
風雨都無一日寒花引遊蜂香四座人穿蕭寺景千般  
清明休假歡心洽飽德咸知有上官

淳熙三山志

蒲瀛

次韻袁升之遊海雲寺鴻慶院山茶之什

山茶兩本上連空疊葉棲枝占佛宮雀尾有金輸紺碧

鶴頭無火讓殷紅優于峽茗稱呼異劣與梅花氣候同  
誰識諸天雨花外道人宴坐雪霜中

遊呪土寺西臺

偶到城西寺人言呪土墳夕陽臺半出秋草徑斜分地  
下無紅粉天邊有碧雲徘徊追往事風急葉紛紛

以上成都

文類

許尹

尹字覺民紹興中處州守

和吳謹思題仙都山

黃帝得仙從此去，鼎湖傳說幾經年。  
龍髯墮地成青草，

直到如今不上天。

仙都山志

吳謹微

謹微紹興中縉雲人

遊仙都山

薄宦驅人畏簡書，金柔暑濁倦征途。  
歸來有意尋真境，路入仙都不憚迂。

山下霏微雨灑塵門前嘹唳鶴迎人遂成一覺仙都夢

更訪遺蹤得隱真

仙都山志

楊咸亨

江郊亭新成賦二十三韻

蜀江千里東南傾峽門橫鎖千丈鯨吳帆蜀檝過如織  
府主四海皆弟兄城西門前二十里客去當送來當迎  
藤梢橘刺密無路短亭四壁荒榛荆春風淡施酌客處  
我陪後乘同郊行碧油紅旆駐沙尾連宵急雨鼓不鳴

元戎玉皇香案吏俛仰茅屋無乃輕擘山鞭石相原隰  
釘頭瓦縫粟縷盈偉哉幻出此奇觀丹楹畫棟光崢嶸  
山長波迴目力短空濛宜雨高宜晴危嵐滴翠染窗戶  
空江倒影翻簷甍天長地久設相待更為佳處題佳名  
梁間橫陳大手筆龍蛇飛動神鬼驚高齋百篇子美唱  
峴首千載羊公情試呼小隊訪新館壯遊始與勝槩并  
披雲喚月星斗動放舟聞鶴天水明練光渺渺風力壯  
疊鼓西上帆東征舳艫冠蓋兩歎息謹謠畫亂通樵聲

元戎故是活國手山河指顧風塵清淒涼三峽小遊戲  
樸斲丹黝安足程明堂梁棟要杞梓天關一柱須公擎  
紛紛故吏萬里外燕雀行慶大厦成賦詩抵掌者誰子

夜郎野老楊咸亨

全蜀藝文志

沈東

東字元敘崑山人

遊滄浪亭

草蔓花枝與世新登臨空復想清塵只今唯有亭前水



曾識春風載酒人

中吳紀聞

沈長卿

長卿字文伯湖州人為常州倅忤秦檜貶化州

句

翠蛾環坐憶洲錢

至元嘉禾志洲錢市在崇德縣西北二十七里  
宋南渡初士大夫來寓者殆二十家贈申國趙  
公不求父子寓踰一紀慶公善應字彥遠詩翰  
尤妙蘇計屬師德仁仲呂顯謨正己仲發迭主  
詩盟即祇園精舍為替盍之所詩人沈文伯有  
句云云

柴援

援嘗為小吏自言周室之裔頗能詩

寄遠

別時指我堂前柳柳色青時望子時今日柳綿吹欲盡  
尚憑書去說相思

客舍

隻影寄空館蕭然飢鶴姿秋風北窗來問我歸何時

以上

卻歸編

張頤

清淮樓

在濠州

觀魚惠子臺蕪沒夢蜨莊生冢木秋唯有清淮供四望  
年年依舊背城流

方輿勝覽

邵稽仲

龍州

峭壁陰森古木稠亂山深處指龍州猿啼鴉噪溪雲暮

不是愁人亦自愁

方輿勝覽

許表

項王廟

在烏江號靈惠廟

千載興亡莫浪愁  
漢家功業亦荒邱  
空餘原上虞姬草  
舞盡春風未肯休

方輿勝覽

史幹

題鵝鼻山

龍泉五盞張帆去  
鵝鼻三杯衣錦歸  
寄與長泉後來者  
年年盛事莫相違

方輿勝覽山在眉州青神縣長泉北長泉士人  
每登科而歸鄉人迓之于此三酌史幹有詩

宋詩紀事卷四十九